

X

№ 4619 *

30

00 J



Römischer Key. Ma.

Mandat vnd Warnung an alle die von
der Ritterschafft im heiligen Reich Deud-
scher Nation / Das sich keiner den Er-
flerten Echtern oder irem Recep-
tatorn oder Heger anhen-
gig machen
solle.



Wir Maximilian der
ander von Gottes gnaden/erwelter Römischer
Keyser zu allezeiten Mehrer des Reichs/ In Germanien/ zu Hungern/ Behaim/ Dalmatien/ Croatien/ vnd Sclauonien/ etc. König/ Erzherzog zu Osterreich/ Herzog zu Burgundi/ Steyer/ Khernten/ Crain vnd Würtemberg/ etc. Graff zu Tyroll/ etc. Entbieten vnsern vnd des Reichs lieben getrewen/ N. gemeinen freyen Ritterschafft der fünff teil im Land zu Schwaben/ Item/ der sechs Ort des Lands zu Francken/ auch am Rheinstrom vnd in der Wederaw/ vñ sonst allen andern vom Adel/ wo vnd welcher Enden die allenthalben im heiligen Reich/ desselben zugethanen Fürstenthumen/ Obrikeiten vnd Gebieten gesessen sein/ Vnser gnad vnd alles guts/ Lieben getrewen. Euch ist vnser uerborgen/ Welcher massen wir auff jüngst gehaltenem Augspurgischem Reichstage/ vns mit Churfürsten/ Fürsten vnd Stenden des heiligen Reichs/ vnd der abwesenden Rheoten vnd Botschafften/ so auff ist gemelten vnserm ersten Reichstag/ bey vns zu Augspurg versamlet gewest/ vnd sie hinwiderumb sich mit vns/ auff vorgehende/ stattliche/ bedechtige vnd Notwendige Erwegung vnd Berathschlagung der Sachen/ einhelliglich verglichen vnd entschlossen/ weillent des Durchleuchtigen Fürsten/ Herrn Ferdinanden Römischen Keyser/ etc. Vnsers geliebten Herrn vnd Vaters/ hochmilder Gottseliger gedechtnis/ hienor Ausgangne offene publicierte General Acht Executions Mandat/ wider den Echter/ der sich nent Wilhem von Grumbach/ vnd seine Consorten vnd mit Echter/ fürnemlich die zween/ so sich nent Wilhelm vom Steyn/ vnd Ernst von Mandesloe/ Auch Jobsten Zedewitz/ Dietterich Pichten/ vnd Micheln Faistlin/

lin / irer begangenen Landfriedbrüchigen / gewaltthetigen
Oberfals/Einnemung vnd Plünderung der Stad Würz-
burg vnd anderer irer vnthaten vnd mishandlungen halber/
Vmb deren willen sie in krafft Züngst hieuor auffgerichter
Reichs abschied / ober die Peen/in andern vnsern vnd des
Reichs Constitutionen/Sagung/ Ordnungen / vnd sonder-
lich dem gemeinen ausgefündigten Landfrieden begriffen/
In vnser vnd des Reichs Acht ipso facto, gefallen / würck-
lich zuuolziehen/Vnd solch ExecutionsMandat wider zuer-
newern vnd zuschörffen / Auch ober das noch verner vnd in
sonderheit gegen obgedachter Echter Receptatorn, Auffent-
halten/ Vnterschleiffen / Helffer vnd Helffershelffern/
sondere Mandat öffentlich in das heilige Reich zu Publicie-
ren vnd auszufünden/darinnen inen bey peen der Acht zu ge-
bieten / sich der Echter zu entschlahen / Vnd da sich solche
Echter noch bey in erhielten / vns dieselbigen zu gebürlicher
straff zu oberantworten/ etc. Wie wir dann zu gebürender
volge ist erzelt vnsers vnd gemeiner Reichs stende eintrecho-
tigen beschlus vnd vergleichung / damaln als bald vor ange-
regt weillent vnser geliebten Herrn vnd Vaters Keyser Fer-
dinanden / hochlöblicher gedechtnis wider die Echter aus-
gangen Acht Executions Mandat widerumb erfrischt / ge-
schörfft/ vnd Churfürsten/Fürsten/vnd gemeinen Stenden
des heiligen Reichs / auch vnserer Königreich / Erblichen
Fürstenthumen vnd Lande / Vnterthanen / allen samplich
vnd jeden in sonderheit. Desgleichen vnd nicht weniger
auch der bestimpten Echtern Receptatorn, Auffenthalttern/
Helffern vnd Helffershelffern/durch vnser vnterschiedliche
offene vnd publicierte Keyserliche Gebotsbrieff/ von newem
bey den Pflichten / damit ein jeder vns vnd dem Reich ver-
wand/auch bey vormeidung vnser vnd des Reichs schweren
vngnad/straff/vnd Peen des Landfriedens/ Acht vnd Ober-
acht/auch bey vorliering aller irer Regalien/Lehen/Freyhei-
ten/

ten/ Gnaden/ Schutz vnd Schirms / so viel ein jeder dessen
von vns vnd dem heiligen Reich hat/aus Röm. Key. Macht
ernstlich Mandiert auffgelegt vnd geboten/das sie obgenante
Echter / inn vnsern Erblichen/ des heiligen Reichs vnd iren
Fürstenthumen / Landen / Graffschafften / Herrschafften/
Gebieten/ Gerichten/ Schlössern/ Stedten/ Merckten / Fle-
cken/ Dörffern/ Weyllern/ Höfen vnd Heusern/nicht einlas-
sen/hausen/hofen/herbergen / eken / trencken / enthalten / lei-
den/vulden/furschieben/ durchschleiffen / schützen / schirmen/
begleiten/ noch sonst einige hülff / förderung oder beystande
thun/noch solches den iren/ oder jemandes andern zuthun ge-
statten / weder heimlich noch öffentlich / inn keinerley weis
noch wege / Sich auch sonst derselben Echter nicht anne-
men/ teilhafftig / oder inen anhengig machen / noch einige
Gesellschaft oder gemeinschaft mit inen haben/sondern sich
dessen gantzlich vnd aller dings enteuffern / Auch ir aller leib/
Schulden/ Hab vnnnd Güter / Wo sie die auff Wasser vnd
Land betretten/erfahren oder finden/ Angreifen/ niderlegen/
bekömmern/arrestieren, verheffen/ire Personen gefencklich
einziehen/vns wol verwart oberliffen vnd folgen lassen/vnd
in allweg gegen mehr gedachten erklereten Echtern vñ Lands
friedbrechern / das jenig handeln vnd fürnemen sollen / was
sich gegen Echtern gebürt/ etc. Alles fernern Inhalts / sol-
cher vnserer offnen Mandat vnd Gebotsbrieff / Derwegen
auff nechst zu Augspurg verlossnen Reichstag publiciert vnd
ausgangen. Wiewol wir vns nun gnediglich vnd endlich
versehen hetten/Es solte angezeigten weillant vnserer geliebo-
ten Herrn vnd Vaters publicierten/auch vnsern darüber mit
Rath/zuthun / vnnnd gemeinem Beschlus / vnserer vnnnd des
Reichs Churfürsten/Fürsten vnd Stende / widermals ernes
werten ausgefündigten Acht Executions Mandaten/ Für-
nemlich von ernenter Echter Receptatorn, Schützer/ Vn-
terschleiffer/vnd Herberggeber Herzog Johans Friderichen
von

von Sachsen/schuldiger gebür / auch vnsern vielfeltigen hie
vorigen vnd seiderher ferners sonderbaren an in erfolgten be
fehlen / vnd ganz gnedigsten ernstlichen erinnerungen / war
nung / vermanungen vnd geboten / Auch den hochuerpeens
den vnsern offnen Keyserlichen Mandaten / seiner pfliche
schuld nach / gehorsamlich gelebt / vnd nachgegangen wor
den sein. So haben wir doch je lenger jemehr / vnd bis da
her / Vber vnser vielfeltige langmütigkeit / Augenscheinlich
gespürt vnd befunden / das Er / Herzog Johans Friderich
vngachtet / vnd hindangesezt angeregte vnser vnd gemeine
Reichs Stende / so statlich / vnd mit zeitigem guten Rath /
Wolbedachtem gemachtem Reichs beschlus / vnd abschied /
Auch darüber erfolgten vnd ergangnen vnsern Mandaten /
Warnung vnd vermanungen / Denselben gestracks widero
stebet / obgesagte Echter vnd Landfriedbrecher / öffentlich
vnd vngescheucht auff der festen Gothaw / etlich Jhar her /
vnd zum teil noch auffenthalten / vnterschleiffen / hausen /
herbergen / schützen / hegen / vnd verteidigen / Ja auch für
seine getrewe Rath / vnd Diener rühmen / vnd also in seinem
verstockten vnerhörten Vngehorsam / Troß / Hochmut vnd
Rebellion / gegen vns vnd dem heiligen Reich / freuentlich
verharren thut / Alles zu mercklicher verachtung vnd ver
kleinerung vnser vnd des Reichs Ehr / Reputation, Hocho
heit vnd Autoritet / vnd zu beschwerlicher Ergernus / auch
gewartender gefahr vnd vnruhe im heiligen Reich. Dies
weil vns dann aus obliegendem Keyserlichem Ampt eiger
vnd gebüret / diesem fürseßlichem / mutwilligem / vnauffhör
lichem Vngehorsam / vnleidentlichen freuel / schimpff / Ver
achtung vnd Rebellion der Echter / Herberggebers / vnd
Verteidigers / Herzog Hans Friderichs von Sachsen /
lenger oder ferrer keines wegs zuzusehen / sonder ernstlich das
gegen zutrachten vnd wider in / vnd die von im vnterschleiffte
erklärte Echter / mit woluerschulter straff einsten fürzuschreis

ten. So sein wir hochdrungenlich verursacht worden/die
Acht Execution wider mehr bestimpte Echter/vnd iren Re-
ceptatorn, Vnsern vnd des Reichs widerwertigen vnd Reo-
bellen/ Herzog Hans Friderichen von Sachsen/ mit sono-
derm ernst fürzunehmen/ vnd ins werck zustellen/ Vnd haben
derwegen vermög offte berurtes vnsers vnd gemeiner Reichs
stende Beschlus/ auch vns daneben beschehenen freien heimo-
stellung / Dem Hochgebornen Augusten Herzogen zu
Sachsen/ Landgraffen in Düringen / vnd Marggraffen zu
Meissen/etc. Des heiligen Röm. Reichs Erzmarschalcken
vnsern lieben Dheim vñ Churfürsten / als Obersten im ober
Sächsischem Kreis solcher Execution den anfang zu machen
Ernstlich befohlen vnd geboten. Darauff S. L. auch zu
gehorsamer volziehung desselben vnsers Keyserlichen ernstli-
chen beselchs/ sampt etlicher anderer genackbarten vñnd fürs
nemlich denen von vns vnd gemeinen Reichs stenden jüngst
zu Augspurg Deputirten freishülffen / die wir auch darzu
auffgemant/mit einem statlichen Kriegs volec zu Ross vnd
Fus/ fur Gothaw geruckt / vnd solche Festung belegert / In
meinung/ als vnser hizu verordenter Oberster General Be-
uelchhaber / vnd bey diesem heilsamen vnsern vnd des Reichs
gemeinen lustici werck Vertreter/ vnserer Keyserlichen Per-
son/ Ferrers den gebürenden ernst gegen offte gedachtem vns-
sern widerwertigen Rebellen, Herzog Hans Friderichen
von Sachsen/ vnd den Echten Grumbach vnd seinen Con-
sorten/ zugebrauchen/ vnd sie zu wol verdienter straff zu brin-
gen. Damit nun solches vermittels Göttlicher hülff desto
statlicher Exequiert, vnd vollstreckt/ auch im heiligen Reich
Deudscher Nation schuldiger gehorsam / Fried / rhue vñnd
einigkeit erhalten / darzu die heilsam lustitia, Gericht vnd
Recht/ sampt andern guten löblichen saktionen vnd ordnun-
gen vmb so viel besser gehandhabet werden mögen. Dem als
lem nach/ Empfehlen wir euch allen/ vnd ewer jedem in sono-
derheit/ Bey den Pfflichten / damit jr vns vnd dem heiligen

Reich/ auch sonst zum teil ewren ordentlichen Herrschafften
vnd Obrigkeiten/ zugethan/ Auch bey vermeidung vnser vnd
des Reichs schweren vngnad/straff vnd Peen des Landfrie-
dens/ Auch bey verwirkung vnd verlierung aller ewrer Leo-
hen/ Freyheiten/ gnaden/ schutz vnd schirms/ souiel ewer jeder
dessen von vns vnd dem heiligen Reich / oder auch von an-
dern Fürsten vnd Herrn hat/ Von Röm. Key. Macht hie
mit ernstlich gebietend/ vnd wollen / das jr euch vorgemelter
erklerten Echter/ vnd jres widerwertigen Landfriedbrüchig-
en Receptators, Schützers/ Verteidingers/ vnser vnd des
Reichs Rebellen widerwertigen / Herzog Hans Friede-
richs von Sachsen / wider vns vnd das heilig Reich / die
Churfürsten/ Fürsten vnd gemeine Stende/ desselben gemein-
iglich vnd sonderbarlich/ mit nichte annemet / beladet / oder
inen anhengig machet/ Viel weniger euch durch sie werben/
bestellen vnd gebrauchen lassen/ noch inen sonst einige hülff/
furschub/ oder beystand / vnter was gesuchtem schein / auch
das immer geschehen möchte/ thut / Noch solches den ewren
zuthun gestattet/ Weder heimlich noch öffentlich/ in keiner
ley weis/sonder euch solcher Echter / vnd derselben mehr ge-
nantes Rebellen Receptators, Herzog Hans Friede-
richs von Sachsen vnser vnd des Reichs öffentlichen vnd
vngescheuchten widerwertigen gentslich entschlaget / vnd
vorgedachten vnsern Jüngsten wider diese obbenante Ech-
ter vnd Echters helffer erneuerten ausgangnen offenen Acht
Executions Mandaten vnd Gebotsbrieffen/ ewers theils ge-
horsamlich gelebet / vnd euch nicht anderst haltet / Als lieb
euch allen vnd ewr jedem sey/ obberurte Peen vnd straffen zu
uermeiden/ Das meinen wir ernstlich/ Vnd da sich darüber
einer oder mehr aus euch/ diesem vnserm vnd vorigen ausge-
kündigten Mandaten zuwider/ oft bestimmter Echter / vnd
jres Herberggebers/ Schützer vnd Verteidingers/ vnd Land-
friedbrechers / Herzog Hans Friderichs von Sachsen/
Wider vns vnd das heilige Reich/ oder ein/ oder mehr Sten

De desselbigen/ Hoch oder Nider / Vnd fürnemlich wider
vnsere Keyserlichen General Beuehlhabers / des Churfürs-
ten zu Sachsen L. vnd andere alle Glieder des Reichs / so
wir vnd gemeine Stende zu wirklicher fortsetzung dieser
heilsamen hochnot bedrangten Execution verordnet/ auffge-
fordert/ vnd sie sich derselbē anhengig gemacht/ etc. einlassen/
Inen den oft ernanten vnsere vnd des Reichs Feinden adhae-
rieren oder beyfallen/ vnd sich also inen vnd irer bösen Land-
fridbrüchigen Rebellen sachen teilhafftig machen / Inen
dienen/ oder sonst einige hülff/ förderung vnd beystand / wie
vor stehet/ oder des durch Menschen sinn mag erdacht wer-
den/ erzeugen würde/ Der oder dieselbigen sollen one alle fern-
nere erklerung/ Ist als dann/ vnd dann als iho alle ire Le-
hen/ gnaden vnd Freiheiten genzlich verwirckt / vnd darzu
ipso facto, in obbegriffene Peen/ vnd straffen gefallen sein/
Darein wir sie auch hiemit aus obberurter vnser Key. Macht
erkennet vnd erkleret/ vnd gegen den vngheorsamen Verbre-
chern/ mit angezeigten straffen/ vnd sonderlich mit Confiscie-
rung vnd entsetzung irer Lehen / Freiheiten / gnaden / schutz
vnd schirms/ vnnachleslich verfare lassen. Auch allen Chur-
fürsten/ Fürsten/ Herrschafftē vnd Obrigkeiten / Von denen
solche Verbrecher Lehen tragen/ vnd innen haben / nicht als
lein zugelassen sein solle/ Auch iren L. vnd inen vollen gewalt
vnd macht gegeben/ Sondern auch hiermit geboten/ vnd auff-
erlegt haben wollen/ Dieselben ire der Vngheorsamen // Le-
hen/ vnd eigen Stück/ vnd Güter/ one einigen weitem Rechte-
lichen Process/ auch zu irem Handen einzuziehen/ vnd darmit
genzlich ires gefallens zu handeln/ Darnach wisset euch zu
richten. Geben auff vnserm Schlos Podiebrad / an der
Elb/ am tag Matthe / des heiligen zwelff Boten / Den 25.
Februaris/ Im Jahr/ als man zelt nach Christi vnseres Sea-
ligmachers geburt/ der mindern zal/ Im 67. Vnserer Reiche
des Römischen im 5. Des Hungerischen im 4. Vnd des Bey-
hemischen im 28.

78 52 $\frac{4}{13}$

ULB Halle

3

004 067 266




TA-0C



c





Römischer Key. Ma.
Mandat vnd Warnung an alle die von
der Ritterschafft im heiligen Reich Deuds-
cher Nation / Das sich keiner den Er-
flerten Echtern oder jrem Recep-
tatorn oder Heger anhen-
gig machen
solle.

